

Skattavakt PwC

Fréttabréf Skatta- og lögfræðisviðs

Skattavaktin er mánaðarlegt fréttabréf PwC hf. þar sem sérfræðingar á Skatta- og lögfræðisviði félagsins skrifa um athyglisvert efni tengt skattarétti. Leitast er við að gera grein fyrir nýju efni, hvort sem um er að ræða dóma, lög, frumvörp, úrskurði eða stjórnvaldsákvæðanir.

Efnisyfirlit

Starfshópur fjármálaráðherra um breytingar og umbætur á skattkerfinu skilar áfangaskýrslu

Þann 23. apríl 2010 skipaði fjármálaráðherra starfshóp til að móta og setja fram heildstæðar tillögur um breytingar og umbætur á skattkerfinu í framhaldi af breytingum sem gerðar voru á skattalöggjöfinni á árinu 2009. Starfshópurinn skilaði áfangaskýrslu til fjármálaráðherra þann 23. september sl.

Hæstaréttardómur nr. 471/2010

Þann 16. september 2010 staðfesti Hæstiréttur dóm Héraðsdóms Reykjavíkur þess efnis að miða skyldi við lægstu óverðtryggðu vexti Seðlabanka Íslands við uppgjör ólögðmætra gengistryggðra lána, enda væru samningsvextirnir órjúfanlega tengdir gengistryggingunni og féllu úr gildi með ólögðmæti hennar.

IFA ráðstefnan 2010

Sviðstjóri TLS sat síðsumars alþjóðlega skattaráðstefnu IFA í Róm. Þar var efst á baugi krafa um aukna samvinnu aðildarríkja um upplýsingagjöf og eftirlit með misnotkun skattareglna milli landa.



Starfshópur fjármálaráðherra um breytingar og umbætur á skattkerfinu skilar áfangaskýrslu

Viðmið starfshópsins við mótun hugmynda að skattabreytingum er að áform ríkisstjórnarinnar um 11 milljarða króna tekjuöflun á árinu 2011 náist. Sem fyrr segir átti starfshópurinn að skila áfangaskýrslu til fjármálaráðherra sem m.a. skyldi fjalla um ábendingar og hugmyndir um fjáröflun á árinu 2011 í samræmi við áform ríkisstjórnarinnar um tekjuöflun á því ári.

Í stuttu máli má segja að hugmyndir starfshópsins séu eftirfarandi:

1. Hækkun á fjármagnstekjuskatti og tekjuskatti lögaðila úr 18% í 20%
2. Hækkun/breyting á auðlegðarskatti. Skatthlutfall var 1.25% á nettóeign hjóna yfir 120 m. kr. og nettóeign einhleypra yfir 90 m. kr. Að mati starfshópsins ætti að vera mögulegt að hækka núverandi skatthlutfall, en einnig kæmu til greina breytingar á fríeignamarkinu.
3. Hækkun á erfðafjárskatti úr 5% í 10%
4. Hækkun/breyting á vörugjöldum áfengis og tóbaks. Að mati starfshópsins kemur til álita að fella niður undanþágu vörugjalds á sölu áfengis og tóbaks í komuverzlunum fríhafna.
5. Hækkun kolefnisgjalds á fljótandi eldsneyti í 75% af viðmiðuninni.
6. Uptaka skatts á fjármálaþjónustu.

Hæstaréttardómur nr. 471/2010

Málið snérist um gengistryggðan samning um bílalan sem fjármögnunarfyrirtækið Lýsing gerði við lántaka. Ákveðna þurfti hvaða vexti lánið skyldi bera, en með dómi Hæstaréttar, dags. 16. júní 2010 (mál nr. 153/2010), var komist að þeirri niðurstöðu að samningur hliðstæður þeim sem mál þetta varðaði, væri um lán í íslenskum krónum, sem bundið væri við gengi tiltekinna erlendra gjaldmiðla og að slík gengistrygging væri óheimil. Af þeim sökum töldust ákvæði samningsins um það efni ekki skuldbindandi fyrir þann sem þar var nefndur leigutaki.

Í máli því sem nú var til umfjöllunar greindi aðila á um hvort og þá hvaða áhrif ofangreindur dómur Hæstaréttar hefði á vexti af láninu. Lánþeginn krafðist þess að samningsvextir yrðu látnir gilda, en þeir eru miklu mun lægri en lægstu óverðtryggðu vextir Seðlabankans á hverjum tíma, sem héraðsdómur hafði áður dæmt að skyldu gilda.

Í dómi Hæstaréttar kom fram að vextir samkvæmt samningi aðila væru tengdir beint við LIBOR vexti af lánum í þeim myntum, sem hin ógilda gengistrygging samkvæmt samningi aðilanna miðaðist við. Í þessu sambandi yrði að gæta að því að fullljóst væri að slík vaxtakjör af láninu gætu ekki komið til álita nema í tengslum við gengistryggingu þess, sem nú lægi fyrir að óheimilt hafi verið að kveða á um.

Einnig yrði að líta til þess að eftir að ákvæði í samningnum um gengistryggingu hefði verið metið ógilt væru skuldbindingar við lántaka við Lýsingu að öllu leyti í íslenskum krónum, og algerlega óháðar tengingu við hinar erlendu myntir sem aðilarnir gengu út frá við gerð samningsins. Þegar virt væri að ákvæðið um gengistryggingu í samningi aðilanna væri ógilt, og *þeim og* órjúfanleg tengsl væru milli þess ákvæðis og fyrirsmæla þar um vexti, væri hvorki unnt að styðjast við þau fyrirsmæli óbreytt eftir orðanna hljóðan né gefa þeim með skýringu annað inntak, enda lægi fyrir í málinu að á millibankamarkaði í London hefðu aldrei verið skráðir vextir af lánum í íslenskum krónum. Vegna þessa taldi Hæstiréttur óhjákvæmilegt að ógildi ákvæðisins um gengistryggingu leiddi til þess að líta yrði með öllu fram hjá ákvæðum samningsins um vaxtahæð. Þar sem í samningi aðila væru ákvæði um vaxtahæð, sem samkvæmt framansögðu yrði ekki beitt, svari atvik til þess að samið hefði verið um að greiða vexti af peningakröfu án þess að tiltaka hverjir vextirnir væru. Samkvæmt lögum um vexti og verðtryggingu skyldu vextir þegar svo stæði á vera á hverjum tíma jafnháir vöxtum sem Seðlabanki Íslands ákveður með hliðsjón af lægstu vöxtum á nýjum almennum óverðtryggðum útlánnum hjá lánastofnunum og birtir eru. Var því fallist á þá kröfu Lýsingar sem laut að því að skuld lántaka við hann væri óverðtryggð og bæri vexti til samræmis við framangreint.

Ráðstefna IFA í Róm

Í lok ágúst fór starfsmaður á skatta- og lögfræðisviði á ráðstefnu International Fiscal Association (IFA) sem haldin var í Róm að þessu sinni. IFA er helsta fagfélag skattaráttarfræðinga um allan heim. Meðlimir félagsins eru frá opinbera geiranum, alþjóðastofnunum, háskólum og úr einkageiranum. Á ráðstefnum félagsins er fjallað um helstu strauma og stefnur í skattamálum þjóðríkja og hverju sinni tekin sama skýrsla aðildarríkjanna yfir starfsemi síðasta árs. Fulltrúar OECD mæta og gera grein fyrir áhersluatriðum og fyrirhuguðum breytingum á tvísköttunarfyrirmyndinni.

Að þessu sinni voru áhersluatriðin eftirfarandi:

Tvísköttunarsamningar og skattasniðganga; almennar og sértækar aðgerðir til að koma í veg fyrir undanbrögð og misnotkun skattareglna; erfðafjárskattur, dótturfélag sem föst starfsstöð móðurfélags, ábyrgð skattaráðgjafa, virðisaukaskattur/söluskattur innan samstæða, skattaskjól, skattaleg áhrif og fyrirvarar við endurskipulagningu fyrirtækja, þróun alþjóðlegra skattskila og alþjóðleg samvinna og upplýsingagjöf skattyfirvalda við skattskil.

Af framangreindri upptalningu er ljóst að efnið var ansi yfirgripsmikið og fjölbreytt. Framsögumenn gerðu grein fyrir stöðu einstakra mála og reifuð voru sjónarmið hagsmunaaðila frá báðum hliðum, dómur raktir og þróun réttarreglna. Ljóst er að í þeirri fjármálakreppu sem nú ríkir um allan heim leitast þjóðríkin í auknum mæli við að auka og tryggja skatttekjur sínar, hert er á reglum um milliverðlagningu, kröfur auknar um upplýsingagjöf og gagnsæi og viðurlög aukin. Þá er alveg ljóst að umburðarlyndi vegna hverskyns undanbragða er ekkert. Auknar kröfur um upplýsingagjöf hafa það í för með sér að fyrirtæki, ekki síst þau sem starfa á alþjóðamarkaði, þurfa að verja meiri tíma og fjármunum í undirbúning og skipulag en áður, en sú vinna ætti líka að skila sér í árangursríkari rekstri til lengri tíma lítið.

Skatta- og lögfræðisvið PricewaterhouseCoopers

Við hjá Skatta- og lögfræðisviði bjóðum upp á margs konar þjónustu,
þar með talið ráðgjöf varðandi:

Alþjóðlega skattaráðgjöf · Milliverðlagningu („Transfer pricing“) · Skattlagningu rekstraraðila
Skattlagningu einstaklinga · Virðisaukaskatt · Félagarétt · Samruna, skiptingar og yfirtökur

Starfsmenn sviðsins hafa mikla reynslu og yfirgripsmikla þekkingu á sviði skatta- og
Félagaréttar og veita viðskiptavinum aðstoð og ráðgjöf varðandi lögfræðileg álitaefni
sem skapast innanlands sem og erlendis.


Til að fá frekari upplýsingar um starfseminna er hægt að hafa samband við eftirfarandi starfsmenn:

Ábyrgðarmaður:
Elín Arnadóttir
sviðsstjóri Skatta- og lögfræðisviðs
Sími: +354 550 5322
elin.arnadottir@is.pwc.com

Ritstjóri:
Jóhanna Á. Jónsdóttir
ráðgjafi/lögfræðingur
Sími: +354 550 5356
johanna.a.jonsdottir@is.pwc.com

Þessi samantekt felur ekki í sér ráðgjöf af neinu tagi. Ekki ætti að hafast samkvæmt
vefriti án þess að fá sérfræðilega ráðgjöf. PricewaterhouseCoopers hf.,
PricewaterhouseCoopers LLP, hluthafar, starfsmenn og umboðsaðilar bera ekki
ábyrgð á upplýsingum sem gefnar eru í þessu vefriti eða aðgerðum sem
framkvæmdar
eru af hálfu annarra aðila á grundvelli þessara upplýsinga.

©2009 PricewaterhouseCoopers hf. Allur réttur áskilinn. "PricewaterhouseCoopers"
visar til PricewaterhouseCoopers hf. á Íslandi, nema ráða megi af samhengi eða
beinum tilvísunum að vísað sé í önnur fyrirtæki í samstæðu PricewaterhouseCoopers
International Limited sem öll eru lagalega sjálfstæðar einingar.

PRICEWATERHOUSECOOPERS 

Skógarhlíð 12 · 105 Reykjavík
sími 550 5300 · fax 550 5302
www.pwc.com/is